

الصوم وحياة النصره

(٤٧) أقيت هذه العظة يوم ٢١ فبراير ١٩٧٣

في بداية الأسبوع الثالث من الصوم المقدس يكلمنا الكتاب عن التجربة.. وكأن الكنيسة أرادت أن تدخلنا في سر شركة ربنا يسوع المسيح، في صومه وكل أعماله على الأرض.. فالحقيقة إحنا بنعتبر نفسنا -زي ما بيقول الرسول- أعضاء في جسم المسيح.. وكل ما صنعه ربنا على الأرض؛ صنعه لأجلنا، وصنع بنا أيضًا.. لأننا من لحمه ومن عظامه كقول الرسول **"لأننا من لحمه ومن عظامه"**.. فالكنيسة هي جسم المسيح، فالمسيح حط نقط في الطريق، عاشها حرفيًا.. لا لسبب؛ إلا لأن الكنيسة لازم تعيشها أيضًا حرفيًا.. وليس المقصود بهذا إنه مجرد الإهتمام بالحرف؛ ولكن لأن ربنا يسوع هو الطبيب الحقيقي، خالق نفوسنا، إلى عارف طريق خلاصنا.. فخرج للبرية ليُجرب.. خرج للبرية.. وبعدها صام أربعين يومًا جاع.. وطبعًا المسيح ممكن ماكانش يجوع خالص -كإله- لأن القوة

الإلهية إالى فيه ممكن ما تخليهوش يجوع! لكن كون إن الإنجيل بالنص وبالحرّف يقول إنه هو في آخر الأربعين يوم جاع، وبعد ما جاع جاله الشيطان يجربه؛ إذا ده يستوقف نظرنا! إن الصوم لازم يكون فيه جوع، ول لازم يكون فيه تشكيك.. الإثنين مع بعض.. يجوع -عشان كدة إحنا بنصوم إنقطاعي- وبعدين فيه تشكيك.. وهو نفس الكلام إالى بيقوله الشيطان زمان؛ بيقوله في كل وقت.. يقوله إنت تعبت، وجُعت، وصحتك، وظروفك، وحياتك، وخذ كمان.. آدي آية من الإنجيل من العهد القديم من سفر التثنية، بيقولهم إنتم لما كنتم في البرية؛ كان ربنا بينزلكم المَن من السماء، وكان قادر إنه يطلعلكم من الحجارة دي طعام خبز.. الآية موجودة عندك.. وفاضل إن إنت تطلب من ربنا.. فجوع الرب يسوع جزء مهم جدًا من برنامج الصيام، والكلمة دي إن ما كانتش إتقالت؛ ماكانتش كشفت سر الصوم الإنقطاعي، إن الصوم مصحوب بالجوع.. والجوع في ذهن الوحي الإلهي... مرة ربنا يسوع قال **"طوبى للجياع والعطاش إالى البرِ لأنهم**

يشبعون" .. فهو جوع في مظهره جسدي يتحوّل إلى عطش إلى الله، وبعدين يبقى مافيش مفر أو مافيش حل غير إن الإنسان يشبع من ربنا.. لكنه جوع.. بعد الأربعين يوم جاع.. فكلمة جاع دي مهمة جدّا.. بتكشفلنا الصيام شكله إيه.. أو عطش.. بتكشفلنا سر عطش الرب على الصليب.. صحيح جسده عطش للماء؛ ولكن نفسه أيضًا كانت عطشانة للنفوس إن هي ترجع لربنا! أنا برضه عايز أثبت في ذهننا إن إحنا أعضاء في جسم المسيح، كل ما يحدث للمسيح لازم يحدث لينا كعضو فيه.. عشان كدة يهمننا خالص في صوم الأربعين المقدسة إن الكنيسة كلها تشترك في هذا الصوم.. بعدين إنت تقول مثلاً ده حرية شخصية أو إختبار فردي شيق جميل.. أقولك بس إحنا كلنا أعضاء في جسم واحد.. فالأعضاء دول لازم يكون لهم إحساس واحد، الرب جاع والكنيسة كلها جعانة للمسيح.. في نهاية الأربعين يوم الأربعين يوم دول برضه سر من أسرار المسيح.. أو نقطة على الطريق أيضًا، أربعين يومًا إختلاء.. وده ربط خطير جدّا بين

الصوم وبين الإختلاء.. يعني الصوم في مفهومه في ذهن الرب يسوع؛ هو خروج من وسط العالم، وإعتكاف في الجبل.. من أجل هذا يا أحبائي أصبح فكرة الصوم عندنا لازم يكون لها منهج خاص، المنهج ده عبارة عن منهج يظهر فيه كلمة الإعتكاف.. إعتكاف عن الزيارات شوية، إعتكاف عن النزول كثير من البيت، إعتكاف عن التليفزيون، إعتكاف شوية عن قراءة الكتب إالى مالهاش لازمة، إعتكاف.. الصوم مش بس جوع.. لأنه هو لما إبتدا يصوم؛ خرج للبرية.. وكان ممكن إنه يكمل هذا الصوم وهو في وسط الهيصة بتاعة العالم! فالصوم هايبقى عبء ثقيل على النفس؛ إالى أن يتحوّل إالى متعة روحية.. وهذه المتعة الروحية مش ممكن هاتتم غير في الإختلاء بالله.. والإختلاء بالله ها يكون في البرية، في المخدع، الإعتكاف يعني.. حتى في العهد القديم لما كان يتكلم عن الصوم يقول نادوا بالصوم، نادوا بإعتكاف.. يعني كان يربط الصوم بالإعتكاف.. فربنا إعتكف لكي نعتكف نحن أيضًا.. والإعتكاف ده مش إنعزال؛ ولكنه إمتلاء من أجل

العالم إالى إحنا إعتكفنا عنه.. إعتكاف.. بعدنا شوية عن العالم وأصواته المزعجة الغربية؛ لكي نمتلئ بالروح، ونرجع أيضًا للعالم ونحن في قوة الروح.. ماكانش ممكن أبدًا إن يكون الترتيبات دي جاءت إعتباطًا؛ لكن كونه إن هو نمرة واحد يختلي.. نمرة إثنين يصوم.. نمرة ثلاثة يجوع.. نمرة أربعة يُجَرَّب.. إذا واضح إن دي خطوات بتعيشها الكنيسة.. لأن الكنيسة أعضاء جسم ربنا يسوع المسيح.. إالى عمله إتعمل لينا.. وبعدين من ناحية تانية إالى يمشي في هذا الطريق يبقى المسيح ماشي معاه في نفس الطريق، ويُضاف صوم ربنا يسوع المسيح إالى صومنا الهزيل الضعيف ده.. لما نقول إن الكنيسة كلها أعضاء في جسم واحد، ولازم يكون لها الروح الواحد وتكون عايشة في هذه الأربعين المقدسة في صوم حقيقي؛ يبقى إذا المسيح رأس الكنيسة هو قائد هذا الصوم، ويبقى المتخلف عن هذا الموكب بيحكم على نفسه حكم صعب.. لأن رأس الكنيسة صايم.. الكنيسة كلها نادت بإعتكاف، وبصوم، وبجوع، وتعرّضت للتجربة أيضًا.

نيجي للتجربة -إلى هو موضوعنا- ولو إننا ما نقدرش
نفصلها عن الصوم زي ما شوفنا بترتيب الوحي الإلهي..
الشيطان راح يجربّ المسيح.؟ لأ.. المسيح إلى راح
للشيطان! وده وضع مختلف عننا تمامًا.. ما يصحش واحد
مننا يروح للشيطان عشان يجربّه؛ لكن هذا الوضع مقبول
للمسيح.. مقبول للمسيح لأن الشيطان مالوش حاجة في
المسيح.. مافيهوش ضعفات، مافيهوش خطية عشان
يعاكسه منها الشيطان.. عشان كدة ما راحلوش! لكن ليه
المسيح راح.؟ إذا كان الشيطان مش قادر يروح للمسيح لأنه
ليس فيه خطية واحدة ولا منفذ للخطية؛ طيب ليه المسيح
راح.؟ يا أحبائي ثقوا تمامًا -لابد إن النقطة دي تكون ثابتة في
ذهننا- إن المسيح رأس الكنيسة.. وإن المسيح لم يجربّ
لذاته، ولم ينتفع للتجربة لذاته، لأن الشيطان ده لا يساوي
شيء أمامه.. لكن المسيح جربّ عننا، وانتصر لينا، وقادنا في
هذه المعركة الرهيبة، إلى فيها أعلن الشيطان كل قوته وكل
سطوته، وانتصر فيها المسيح الانتصار الرائع القوي ده..

فالمسيح هو إالى راح للشيطان قاله ياللا نخلص الموضوع القديم إالى بينك وبين الإنسان من أيام لما خرج من الجنة! ويوم لما خرج من الجنة إنت كنت فرحان، وإعتبرت إن ده إنتصار ليك على الجنس البشري.. ومن أجل هذا أنا لبست التوب البشري وصرت أخ ليهم، وشاركتهم في اللحم والدم.. وأنا دلوقت جاي نيابة عنهم عشان خاطر أمسح العار بتاعهم، عشان خاطر أتجرب.. عشان خاطر أخش معاك في معركة.. عشان خاطر أشوفك وإنت بتنهزم قدام ولادي.. فإنتصار المسيح إنتصار الكنيسة كلها.. أرجع وأقول تاني إن المسيح هو الراس، والكنيسة الأعضاء.. إحنا كلنا أعضاء في جسمه.. إنتصار الرب على الشيطان؛ إنتصار لنا كلنا.. ودي نقطة من الناحية اللاهوتية عميقة جداً.. إن النصرة بالنسبة للإنسان المسيحي شيء ليس حدث متوقع في المستقبل؛ لكنه حدث تم في الماضي..! لأن العدو إالى إحنا بنتعامل معاه -إلى هو الشيطان- قد هُزم فعلاً مش لسة هايتهمزم.. تقولي طب فيه ناس يبهدلهم الشيطان الأيام دي..! أقولك همّ

بكيفهم بيروحوله! همّ مش العيب في الشيطان لأن قلبهم همّ ميّال للعالم، وميّال لهمومه، وميّال لإرتباطاته.. وهم بيروحوا بنفسيهم، برجليهم.. ويبهدلهم الشيطان! لكن الشيطان ما يقدرش ينتصر على أولاد الله أبدًا أبدًا أبدًا.. وإن النصره إلی بنتكم عليها؛ ليست حدث هايتم لينا في المستقبل.. وموقفي بالنسبة للشيطان قد حُدد وانتهى من زمان، من التجربة على الجبل.. وانتصار ربنا في التجربة هو إنتصار للكنيسة كلها.. عشان كدة نفسي نسمي الكنيسة بتاعتنا الكنيسة المنتصرة.. لأن التعبير ده دخلنا من الغرب شوية.. يسموا الكنيسة إلی على الأرض الكنيسة المجاهدة والكنيسة إلی في السماء الكنيسة المنتصرة.. إحنا مش هانسميها كدة، إحنا هانسمي الكنيسة إلی تحت الكنيسة المنتصرة، وإلی فوق الكنيسة المنتصرة برضه.. إلی تحت إسمها الكنيسة المتغربة؛ زي مايقول معلمنا بولس الرسول وإلی فوق الكنيسة المستوطنة عند الرب.. يعني الكنيسة إلی وصلت بسلام، والكنيسة إلی في أرض الغربة.. لكن ليه

ما نسميش الكنيسة إالى على الأرض الكنيسة المنتصرة إذا كان رأسها إنتصر خلاص..؟! دي ناحية مهمة قوي.. تخيل معايا بقى إن الكنيسة دي -إحنا كأفراد شعب كدة أعضاء في جسم المسيح- عايشين في عمق النصرة..! تقولي ما ساعات يا أبونا بنقع وقعات جامدة.. أقولك ولا يهملك لأن الراس بتاعنا إنتصر.. لكن وقعاتنا دي سببها وحاشتنا إحنا.. لكن إحنا لو إكتشفنا القوة الغير محدودة الكامنة فينا قوة الرب يسوع؛ لعاشت الكنيسة في عمق النصرة.. ودي مستوى حياة الكنيسة؛ مش مفروض تعيش أقل من كدة.. كنيسة الشهداء.. يعني كان إضطهاد.. يعني مش زي البكش بتاع الأيام دي..! وكان الإضطهاد إضطهاد.. وكانت الكنيسة منتصرة ورافعة رأسها.. كانت الكنيسة كنيسة الصلاة، كنيسة العبادة.. كان يقولك يسمعوا أصوات الرهبان في الصحراء زي أبراج الحمام إالى بتناغي كدة، وكانت حياتهم الأسرية حياة مسيحية كاملة.. لو دخلت أي بيت مسيحي تجد المكان بتاع الصلاة، تجد العيال إالى حافظة المزامير، تجد الترتيل طول

النهار، لو طلعت للغيط أو للزرع تجد العيال يزرعوا وييرتلوا، الكنيسة عاشت في نصرة مستمرة.. مش عاوز أقول النصرة دي أو الكنيسة المنتصرة دي إسم لسة هاناخده في السماء، لأ.. نحن الكنيسة المنتصرة متغربة عن الرب.. صح! إن إحنا بنجتاز في الغربية لكن أنا باسميها باقول ليه هي الكنيسة المنتصرة؟ لأن الكنيسة دي رأسها الرب يسوع؛ إزاي ماتكونش منتصرة؟ وهو إنتصر على الشيطان في التجربة، وسحقه على الصليب، وداس الموت بالموت، وأدان الخطية بالجسد.. في كل الإتجاهات حارب وإنتصر.. الشيطان على الجبل، والشيطان تحت الصليب، والموت كسره ودان شهوات الجسد في الجسد، لأنه حمل خطايانا كلها على الخشبة.. هو ده المسيح بتاعنا إالى مش عايز أتحرك حركة في الصوم من غير ما أكون لازق فيه.. هو راسي.. هو رأس الكنيسة.. أرجوك ما تصومش وأرجوك ما تحاولش تجاهد لكن الأول إكتشف إن إنت عضو في جسد المسيح؛ وبعدين صوم وصلّي وجاهد.. هاتلاقي الأمور كلها مفرحة ولذيذة

وسهلة، لأنه طبعًا لما يبقى المسيح هو قائد كل حركاتنا يبقى وضع ثاني خالص.. إمتى يبقى الصيام عبء؟ والتجربة عبء؟ وأبقى خايف ومرعوب من الشيطان؟ لأن إحساسي بفرديتي.. عايز أقول إن الكنيسة جماعة المؤمنين، مش جماعة! جماعة للمؤمنين ده تعبير ناقص خالص؛ لأن أي جماعة ممكن تقعد في أي حته لكن الكنيسة أعضاء في جسم المسيح.. عشان كدة لنا أب واحد، لنا أم واحدة، لنا معمودية واحدة، لنا روح واحد مالناش روحين، لنا جسد واحد بنأكله.. أنا إتعلت الدرس ده من شاب صغير زمان يمكن من ١٥ سنة وأنا لسة قسيس جديد كدة وبعدين جاي يعترف الشاب ده خادم لطيف تقي حلو عندنا في الكنيسة مش موجود دلوقت، وبعدين وهو بيعترف قعد يعترف بخطايا صعبة شوية، أنا ماكنتش مصدق! قلت إيه يا أخويا ده بيتكلم عن نفسه ولا الولد ده بوشين؟ جوة الكنيسة شكل وبرة الكنيسة شكل! وبعد ما يعترف وتنزل الدموع من عينيه يقولي إديني يا أبونا عقاب على الخطايا بتاعتي دي أو حاجة

تدريب ويقوم.. وبعدين أنا إحترت!! في يوم من الأيام قولتله
ليه إنت بتحكي خطايا وإنت في الكنيسة لك سلوك معين؟
فقال يا أبونا أصل أنا ساكن في شقة وليّ زميلي مسيحي ودي
خطاياها هو مش أنا، مش أنا وهو أعضاء في جسم واحد! هي
خطيته يعني مش بتجرح المسيح زي ما خطيتي بتجرح
المسيح! قلت يا سلام آهو ده الإحساس العميق إلی وصل
إلی إن فعلاً الكنيسة كلها جسم واحد، أعضاء ورأسها هو
المسيح.. وكون إن أنا أجرحه أو إنت تجرحه ما فرقتش أبدًا..
بهذا الإحساس ممكن نصوم وبهذا الإحساس ندخل في
التجربة، وبهذا الإحساس نحتمل ضعفات إخواننا، وبهذا
الإحساس تبقى خطية أوحش إنسان في الكنيسة هي خطيتي
أنا، إيه الفرق؟ ما هو مسيحي واحد مش إثنين.. لو كانوا إثنين
كنت أعمل زي الإبن الكبير ساعة لما قال لأبوه وأنا مالي.. أنا
ما عملتش حاجة وحشة، هو إبنك الضال ده الوحش إلی زي
الزفت، لكن أنا بإستمرار في طاعتك.. فالكنيسة في حركتها في
صومها في إعترافاتها كنيسة واحدة.. في آلامها في جرحها جرح

واحد، في خطايا إذا كانت كل خطايانا بتتحط على الذبيحة؛ يبقى إيه الفرق بين خطيتي وخطيتك.؟ مفروض عشان أكون مسيحي مضبوط أبتدي أحس بإحساسات كل فرد في الكنيسة، وأول ما أخويا ما يعمل خطية تبقى خطيتي أنا بالضبط مافيش فرق؛ لأن الإيد دي والإيد دي واحد مش إثنين، وأول لما نتحرك للصوم نتحرك كلنا بقوة واحدة، ولما نعيش في حياة النصرة نعيش ككنيسة واحدة قوية منتصرة الشيطان تحت رجليها.

خرج المسيح -رأسنا- لِيُجَرَّبَ من إبليس.. جربه ٣ تجارب يمكن الرسول تعرض لهم مرة تانية قال.. شهوة الجسد وشهوة العيون وتعظم المعيشة.. أعتقد همّ دول الثلاثة الأولانية الخبز شهوة الجسد.. والثانية شهوة العين وممالك الأرض.. والثالثة تعظم المعيشة إرمي نفسك من فوق.. همّ دول التجارب إلى عرضهم الشيطان.. إشمعنى ثلاثة.؟ خَلِّي بالك كويس صدقني لو درست التلات تجارب دول كويس خالص؛ هاتبقى إنت غطيت كل مجال الحرب بتاع الشيطان

معاك! لأن التجربة دي مش حاجة جات كدة في السكة؛ التجربة دي متخططة ومرتبة كبرنامج مُحكم جدًا لطريق النصرة للإنسان البشري مع الشيطان.. مُحكم.. كفاية التلاتة دول.. شهوة الجسد، وشهوة العيون، وتعظم المعيشة قبل ما نرجلهم تاني.

نبتدي بشهوة الأكل.. يقوله حوّل الحجارة إلى خُبز.. قاله بس **"ليس بالخبز وحده يحيا الإنسان"**.. لكن بالمسيح يحيا الإنسان، لإن معنى إنه بيقوله بكل كلمة تخرج من فم الله -المسيح كلمة الله- يبقى عايز يقوله بالمسيح يحيا الإنسان.. وبعدين عايز يقول يا بعيد يا شيطان يا غبي ما هو أنا المسيح كلمة الله إذا كانت الآية بتقول.. **"ليس بالخبز وحده يحيا الإنسان بل بكل كلمة تخرج من فم الله"**.. يبقى أنا الحياة كلها إنت بتقولي إيه! فالمسيحي شخص أخذ الحياة الأبدية في شخص الرب يسوع؛ إذاً هو الحياة.. إنت بتكلمني دلوقت عن الحياة بالخبز! وليه أخذ الخبز؟ لأن الخبز له تأثير خطير جدًا في حياة الإنسان -حكم العادة- بحكم

إن الإنسان من طفولته بيلاقي رغيف العيش يأكله الصبح والظهر وبالليل.. وإذا كان فقير أو غني أو مريض أو سليم آهو لازم ياكل العيش.. فحتى إسمها لقمة العيش! فأصبح الإنسان عنده إحساس في كل كلمة يقولك بس حتى الواحد يجيب لقمة عيشه.. إحساسه إن العيش ده هو إلی بيعيشه.. المسيح قال لأ.. ما هو أنا إلی خالق العيش، وأنا إلی خلّيت النفس دي تدب فيها الحياة، وأنا إلی وهبت العيش ده الحياة عشان يديهولكم؛ لأن ده كان مدفون في الأرض بذرة، وطلعت شجرة، وبقت قمح، وإتطحن، وإديتهولكم تاكلوه كعيش.. لكن إلی عايز أقوله إن عايزك وإنت بتاكل رغيف العيش ماتنساش إن العيش كمادة مايديش حياة؛ لكن الحياة جوة العيش من الله نفسه.. عشان كدة أنا بأصلي على الأكل.. عشان كدة أنا بأحس إن اللقمة دي بيديهاني ربنا.. **"ليس بالخبز وحده"**.. ربنا عايز يخلع منا هذا الإحساس.. الإنسان بيعرق طول النهار ويقولك عشان لقمة العيش! لقمة العيش! فالتجربة

الأولانية تجربة الخبز.. والخبز ده حياة الإنسان كلها.. آدم قبل السقوط كان له حياة غير مستقلة عن الله، كان يحس كدة إن ربنا بس الصبح كدة مع ريح الصباح يسمع صوته يعيش على دي طول النهار، ويقعد قلقان طول الليل يمكن يطير نومه كله في إنتظار يسمع صوت ربنا مرة تانية! أكلته! كل يوم ياكل أكلة من ربنا، يسمع صوته ويعيش عليه، كل يوم يقرأ الإنجيل مثلاً بالنسبة لينا ياخذ آية ويعيش عليها، تقرا إنجيلك كدة ده تدريب مهم خالص خد آية ولو واحدة وتردها طول اليوم وتعيش عليها.. وتجرب كدة ممكن الآية دي تديك قوة حياة زي الخبز ولا أكثر كمان! **"ليس بالخبز وحده يحيا الإنسان" ..** وبعدين كل ما نتعمق في العصر المادي إلى إحنا فيه ده؛ تبقى مشكلة الخبز هي المشكلة الأساسية لكل الشعوب وللعالم كله.. ويبقى الخبز هو حياة البشرية والمجاعات بتاعته بسبب عدم وجود الخبز.. وبعدين الناس إلى عندهم خبز كثير وفايض عنهم دول في ملء الإطمئنان؛ لكن تبص تلاقي يفاجئهم أمور كثيرة..

مشاكل، ضيقات، أمراض، أتعاب، موت، ولا الخبز ينفع حاجة! الراجل الغني إلى خزّن في مخازنه قاله.. **"يا غبي في هذه الليلة تُطلب منك نفسك"**.. خَلّي الخبز ده يدريك حياة! المسيح لما علق بقى على الحتة دي، قالهم إسمعوا.. إنتم لسة مش هاتقدروا تعيشوا كويس؛ لأنكم مش فاهميّني.. أنا رأس الكنيسة وإنتم أعضاء في جسم الكنيسة.. طب يبقى الحياة تيجي منين؟ **"أنا الكرمة وأنتم الأغصان"**.. ده مني أنا.. الحياة جاية مني! تعرفوا في العهد القديم كنت بانزّل لكم أكل من السماء.. بيتعجن ويتخبز في السماء! تخيل هذا بقى! آباؤكم أكلوا المن ده وماتوا!! أُمال إحنا إيه؟ قال لأ.. إنتم يا كنيسة -يا بتاعة العهد الجديد- أعضاء جسمي بقيت حياتكم مني أنا.. **"آباؤكم أكلوا المن في البرية وماتوا"**.. ولكن أنا هاديكم جسدي ودمي تاكلوه وتعيشوا به حياة أبدية.. ولا يهتمكم حتى القبر، ولا التراب، ولا أي ضيق في هذا العالم.. لأن إنتم بتملكوا الحياة نفسيها.. بيقوله يا شيطان ليس بالخبز وحده يحيا الإنسان لكن بي أنا كلمة الله يحيا الإنسان..

فأنا الحياة.. يا بخت الإنسان إلى أخذ المسيح حياته، يقول عنه ربنا **"لن يموت إلى الأبد"**.. ممكن تعيش هذا الإحساس؟! وبعدين إحساسنا في تناول يكون إزاي؟! لو تاخذ بالك تلاقيه مترتب بترتيب التجربة على الجبل.. صوم، وجوع، وإشتياق؛ وبعدين آكل جسد الرب ودمه، ونصرة.. وراء بعض.. عشان كدة حتى في الأيام إلى مافيهاش صيام، لازم نصوم قبل المناولة تسع ساعات أو نصوم من الساعة ١٢ بالليل.. عايز أمر في نفس الطريق إلى مر فيه المسيح.. صام، وجاع، وبعدين قال طب حوّل الحجر إلى خبز! قاله لا ما تحياش بالخبز؛ لكن بكلمة الله.. فين كلمة الله؟ على المذبح.. جسده ودمه المذبوحين من أجلنا.. دي التجربة الأولى، تجربة الخبز، تجربة حياتنا كلنا.. عاشها دانيال.. قاله جربني عشرة أيام، وقاله إنت عايز تحط راسي تحت السيف! الملك قال لازم تاكلوا وتشربوا كويس.. قاله جربني! الحياة مش بالعيش، ولا بالخمير بتاع الملك، ولا بحاجات.. جربني عشرة أيام، إديني القطاني، إديني بس.. في نهاية العشرة أيام

كان أجمل وجه من كل زملائه، وصحته أحسن، وكان عقله وذكاءه أعطاه الله حكمة أحسن من كل حكماء عصره!.. أمال.. واحد عايش بقوة ربنا.. إختبار الكنيسة النهاردة؛ بان هي تعيش بالحياة الأبدية بالمسيح، مش تعيش بالخبز! الكنيسة النهاردة بترتكز على السند بتاعها، الوقف بتاعها، الفلوس بتاعتها، المقتنيات بتاعتها! إحنا كأعضاء في جسم الكنيسة برضه حياتنا كلها بتلف حوالين النقطة دي.. لكن إذا وصل الإنسان المسيحي فعلاً إن حياته من الله فعلاً، وإنه هو واهب الصحة وواهب القوة؛ يبقى ها يبقى زي دانيال..

"ليس بالخبز وحده يحيا الإنسان بل بكل كلمة تخرج من

فم الله" .. لو إبنك ما أكلش الصبح أو ما أكلش الظهر تبقى

زعلان جدًا، والأم زعلانة وتقول الواد صحته بالبلاء.. ولكن

لو ما قرأش الإنجيل أو ما أخذش الآية كتبها في قلبه ورددها

وإجتر فيها طول النهار دي ماتهمش!!.. طب وإيه يعني!؟!

هايعيش إية؟ بتديله حياة الجسد!.. تراب ولد تراب.. أديله

حياة الروح.. إهتمينا بالجسد كثير، إهتمينا بالأكل كثير،

إهتمينا باللبس كثير جدًا جدًا جدًا فوق الوصف.. والعصر ده إسمه عصر اللبس، عصر الجسد.. ولكن ليست الحياة من الله.. معاك قرشك في جيبك تقدر تعيش، مامعاكش ماليكش حياة! لا يا أحمائي.. سيظل فيه نفوس شاهدة أمينة إن حياتها من الله وتعيش في أعماق نفسها إنه.. **"ليس بالخبز وحده يحيا الإنسان بل بكل كلمة تخرج من فم الله"**.. التجربة الأولى تجربة الخبز.

التانية.. **"أوقفه على جناح الهيكل وقال له إن كنت أنت ابن الله"**.. أنا عاوز أربط بين التجربتين.. التجربة الأولانية بيقول.. **"إن كنت أنت ابن الله فقل أن تصير هذه الحجارة خبزًا"**.. والتجربة التانية بيقوله **"إن كنت أنت ابن الله فألق بنفسك إلى أسفل"**.. يبقى التجربتين لو تشوف المقدمة بتاعتهم تلاقىها واحدة.. إن كنت أنت ابن الله! فالحرب هنا جاية منين؟ الحرب تشكيك.. حرب نفسية.. فيها تشكيك.. **"إن كنت أنت ابن الله"**.. عايز يشككني إن أنا ابن لربنا؛ لأن أنا مسنود على ربنا، وبأقول ده أبويا السماوي.. وكل يوم أصلي

وأقول أبانا الذي في السموات.. إذا كنت أنا مسنود على ربنا؛ فهو يقولي تعال بقى إعمل إمتحان لربنا إلی بتسميه أبوك السماوي وخليه يخش في الإمتحان ده، وإن كان هو أب فعلاً يجيبك طلباتك، هو كدة الأب.. يعني الأب مش يبقى أب بالفعل ولا أب بالكلام.؟ قال جينا ساعة الجَد أهو.. قال الإمتحان أهو إذا كان ربنا ده أب فعلاً ينجحني في الإمتحان! إذا كان أب يخلي العيال طريقهم يبقى سالك وكل حاجة كويسة! إذا كان ربنا أب... شوف التجربة بدأت إزاي! **"إن كنت إنت ابن الله" ..** وصدقوني يا إخوتي إحساس إن ما فيش حد مننا أو الشيطان ناجح فعلاً في حربه مع الكنيسة إنه يشكك.. شككنا في أبوة الله.. وكلمة أبانا الذي في السموات بتقال كَرَفَر كدة يا داري بيها يا مش داري بيها! لكن حقيقةً إن مسيحتنا كلها بتدور حوالين إن الله أب لينا.. إذا صليت صلي في مخدعك وصلي لأبيك.. إذا صومت ما تخليش حد يعرف وأبوك هو إلی يعرف.. إذا أعطيت صدقة أبوك السماوي يديك.. **"كونوا كاملين كما إن أباكم الذي في**

السموات كامل" .. "لم تأخذوا روح العبودية بل أخذتم روح التبني الذي به نصرخ يا أبانا الآب" .. فقدان روح المسيحية في العصر ده سببها وصل الشيطان إن هو يشكنا في أبوة ربنا أب فعلاً.. فعشان كدة الشيطان بيحارب المسيح ويقوله إن كنت ابن لله في التجربتين و(إن كنت) دي أسلوب تشكيك قديم، من أيام حواء.. لأنه هو قال هل حقاً إن الله قال لكما لا تأكلا من كل شجر الجنة.؟! يا كذاب هو حتى ربنا قال شجرة معرفة الخير والشر وإنت تقول من كل شجر الجنة! وحقاً إن الله! صحيح الحكاية دي.. أما حاجة عجيبة صحيح على ربنا ده! ومنين أب ومنين حنين عليكم؛ ومنين بيقولكم إن أنا إلی يمسمكم يمسم حدقة عينه.؟ ومنين بيقول إن هو بذل إبنه الحبيب من أجلنا.؟ ومنين كل ده؛ ومنين هو حارمكم من الشجرة دي شجرة معرفة الخير والشر.؟ فين الأبوة دي.؟! دي ناحية خطيرة خالص.. يمكن إحنا سمعنا في الآحاد إلی فاتت عن أبانا الذي وإن الله نفسه عاوز يخلينا نعيش كأولاد له بإحساس البنوة العميق.. أولاد،

كل رأسمالي في مسيحيتي إن أنا ليّ أب سماوي، أب حلو، أب قدير، وأب عظيم، وأب بيحبي، وأنا زي الزيت وخاطي، وأب حضنه عمره ما إتقفل في وشي في عز خطيتي.. وبأقولك -بالإختبار يعني- حتى في وسط الخدمة! ولو حد غرقان في خطيته؛ الخدمة تنجح أكثر.. كان ربنا يعلمني كدة ويقولني أنا برضه حنين على الخدمة مش هاعاملهم بأعمالك.. في حياتي الوحشة دي ربنا ينجح طريقي أكثر! كنت أتكسف وأقول إيه الأبوة دي كلها؟ أبويا السماوي وحضنه مفتوح ولذته إنه يحط شماله تحت رأسي، ويمينه تعانقني، دي متعته! يقف كدة يحضن فيّ.. هكذا عاش القديسون، في أبوة الله الكاملة عاش أولاد الله، عاشت الكنيسة.. عاشت الكنيسة كدة مش هاقول كما تجمع الدجاجة فراخها -المثل إلی قاله المسيح- لا أكثر من كدة! ده هو بس كدة حب يديهم مثل بسيط الدجاجة أهي بسيطة يعني.. لكن أنا باتكلم عن ربنا مش يقول جمعهم تحت جناحيه يقول.. **"حملتكم على أجنحة النسر"**.. ده أنا شيلتكم على أجنحتي كدة وطّرت بيكم..

والشيطان هنا هدفه الأول إنه يشككني في أبوة الله، أبوته ليّ.. إن كنت إنت ابن الله بصحيح! وبعدين هانيجي عند نقطة مهمة خالص إحنا دايماً بنقف فيها في العالم.. صحيح إحنا أولاد ربنا ولا مش ولاد ربنا؟! إن كنا أولاد ربنا ليه ربنا ساعات بيسيبننا؟! وبيتدي التشكيك ده!! إن كنا أولاد ربنا لازم نبقي شكله شكل أبونا السماوي.. إن كنا أولاد ربنا ما هو لازم نبقي أولاد قديسين.. وإن كنا ولاد الله فيبقى آمالنا في السماء عند ربنا.. المولود من الجسد جسد والمولود من الله أو من الروح روح.. أعطانا سلطان.. شوف بقى مش ولدنا..

"أعطانا سلطان أن نصير أولاد الله مولودين ليس من مشيئة جسد ولا من مشيئة رجل لكن من الله ولدوا والكلمة صار جسداً" .. ولما يتكلم بقى يقول أيها الآب دول... أنا إبنك بالطبيعة ودول أنا جبتهملك بالتبني.. أريد أن هؤلاء يكونون معي حيثما أكون أنا، وأريد أن يكون فيهم الحب الذي أحببتي به وأكون أنا فيهم.. فمشوار الصوم بتاعنا وإحنا ماشيين في طريق التجربة نعيش وإحنا رأسنا مرفوعة كدة؛

لأن النُصرة حقيقة عاشتها الكنيسة وتمت فيها.. ونعيش كدة، ونمشي كدة وإحنا في حُضن أبونا السماوي في الصيام؛ بإحساس إن الحياة كلها من الله وليست من الخبز أو من أي إمكانية بشرية.. لكن الله هو واهب الحياة بتاعتنا كلها.

بعدين التجربتين التانيين واحدة كانت بيقله ترمي نفسك من على جناح الهيكل لأن فيه تقليد يهودي في التلمود بيقل كدة إن المسيح لما هاييجي هاييجي على جناح الهيكل.. الشيطان خبيث وقاري التلمود وعارفه كويس.. وعارف إن المسيح عارف كل حاجة في التلمود.. فقال له تعال على جناح الهيكل عشان يديله إيه هو فافكره إنسان عادي عشان يديله إحساس العظمة.. المسيح لما هاييجي - في التقليد اليهودي- هاييجي على جناح الهيكل؛ فقال له تعال على جناح الهيكل وقاله إرمي نفسك وهو بيعت ملايكته يخدمونك! المسيحية تميل إلى الإلتضاع الكامل.. ليه أرمي نفسي وليه الحركات البهلوانية دي؟! ده إحنا ما عندناش معجزة في الكتاب المقدس فيها ناحية إن دفاعية كدة! المسيح كان لما

يشوف واحد.. بيقول لما رأى ابن أرملة نايين تحن يسوع وقال لحاملي النعش قفوا، فلمس النعش وقام.. لما لقي الناس جعانة أكلها.. معجزات ربنا يسوع ممزوجة بحبه وعطفه وحنانه.. أطلع على جناح الهيكل.. والإستعراض ده ليه.؟! وإيه تعب كنيستنا أكثر من الإستعراض..!! وزمان كانت كل حاجة في الكنيسة على رأي المثل البلدي تداري على شمعتك تنور! الأقباط كدة عبادتهم سرية، وعلاقتهم مع ربنا في الخفاء، ومخادعهم تزلزل معاقل الشياطين، وعبادتهم في الكنيسة في هدوء وإتضاع ووداعة، ودي الصفة المميزة..

"كل مجد إبنة الملك من داخل" .. وكان المسيحي مسيحي بإيه.؟ مش بعضلاته؛ بقوته إلى جوة، بإيمانه الجبار.. كانوا بيضحكوا عليهم يفتكروهم مايستحملوش! يطلع عيّل صغير زي كدة يخوف قائد.. إيمان قوي جبروت داخلي!

"كل مجد إبنة الملك من داخل" .. إمتى يرجع الوقت إلى الكنيسة تستعيد مجدها من جوة مش من برة.؟ مش من الزخرفة الخارجية.

والتجربة الثالثة يقوله أديك ممالك الأرض.. أولاً هو كذاب وأبو الكذاب، ولا هايدي ولا حاجة.. لكن هو دي طريقته، شهوة العيون.. بص كدة طب إحنا عايشين التجربة دي دلوقت.. شهوة العيون.. شهوة العيون مشكلة الإنسان النهاردة، مشكلة إالى في بيته ويبص على الحاجات إالى في بيت جيرانه ومش في بيته، مشكلة البنت إالى تبص لفستان زميلتها ومش لابسة زيها، مشكلة إالى شاف حاجة من برة وإالى ما شافش حاجة، مشكلة العيون.. يقولي أديك كل ده بقى.. ياللا بس مشي ورايا وأعطيك جميع ممالك الأرض، أديك وتملاً عينيك منها مش عايز تبقى ملك..؟! قاله يا شيطان يا غبي يا بائس، أنا جاي أملك مُلك روجي..! لسة ناس بتتكلم عن المُلك المادي على الأرض.. لسة اليهود مستنيين المسيح ييجي ويملك في أورشليم وييتحاربوا..! وبيعملوا لسة كل ده.. لسة الناس بتفكر إن المسيح هاييجي يملك مُلك أرضي..! المسيح ملك وخلص.. إسمع المزمور بيقول إيه..

"الرب قد ملك" .. فعل ماضي "على خشبة" .. على الصليب

وهو على الصليب قال كدة.. **"أنا إن إرتفعت أجذب إليّ الجميع"**.. المسيح مالك على قلبنا كلنا.. مين يفرط في المسيح لو إدوله العالم كله!! يعني لو الشيطان جالك وقالك خد ممالك الأرض كلها وأسجدلي؛ تقوله لأ.. ما أسجدش غير للمسيح هو ملكي.. فملك المسيح تم فعلاً على قلبنا.. لكن نرجع تاني وأقول شهوة العيون.. شهوة العيون.. عشان كدة ربنا قال آية خطيرة جداً قال **"سراج الجسد هو العين إن كانت عينك بسيطة فجسدك كله يكون نيراً وإن كانت عينك شريرة فجسدك كله يكون مظلماً"**.. النهاردة مطلوب العين البسيطة، العين إلی بتشوف مجد ربنا، العين بتاعة الطفل إلی فيها البراءة، العين إلی هي مش عين حاقدة، ولا عين حسودة، ولا عين شهوانية، ولا عين بتشتهي، ولا عين ما يملاهاش غير التراب.. العين إلی قال عنها سفر الجامعة.. **"العين لا تشبع من النظر والأذن لا تشبع من السمع كل الأنهار تصب في البحر والبحر ليس بملآن"**.. تشبع إمتي.؟

دي التجربة الثالثة.. وبعدين إتخزى الشيطان.. أنا مش عاوز أطول لكن هو ده منهج لحربنا.. فالشيطان بيحاربنا بتجربة الخبز، وتشكيكنا في بنوتنا الله، ورعاية الله للكنيسة في شوية إضطهادات في شوية مشاكل وبتاع، يحاربنا بالشكلية في الكنيسة عشان يخليّ المجد بتاعنا مجد خارجي في منظر الكنيسة والأبنية الفخمة و و إلى آخره.. ما يخليهوش جوة الإنسان، وبعدين يحاربنا بشهوة العين.. العين دي عشان العين دي ما تستريحش أبدًا تفضل زايفة زايفة زايفة وإيه على رأي واحد من آباءنا يقولك العين دي عاملة زي الكاميرا تعمل النيجاتيف (negative) العفريته دي تعمل النيجاتيف دي تطبع عليها كام صورة تطبع زي ما إنت عاوز.. تطبع ألف الفين عشرة آلاف صورة.. تبص تلاقى حاجة دخلت عينك ويمكن عدى عليها يمكن ١٠ أو ١٥ سنة تكون نايم في حلم وتحلم بيها تاني! صورة مطبوعة جوة يعني بس مجرد تتطبع على النيجاتيف دي تطبع صور صور صور صور مالهش بداية ولا نهاية.. الشيطان إتخزى.. وإتخزى لأن

المسيح كشف طرق الحرب بتاعته الثلاثة وسلمهملنا وديعة.. وقال يا أولادي أنا رأس الكنيسة صوموا وجوعوا وعيشوا بيّ وانتصروا.. وآدي إيه فَتَّشْت كل تكتيك الشيطان، دلوقت إحنا سرقنا أو أخذنا من الشيطان كل الخطط إلی هو رسمها لإسقاط الجنس البشري.. إتكتشت كلها.. مافيش خطة لسة مستخبية آهي معانا آهي، طب لما أنا أعرف كل خطط العدو، وأماكن الضعف بتاعته؛ ما هو أنا أبقى إنتصرت خلاص.. نصرة لأن المسيح رأسي.. ونصرة لأن المسيح إنتصر من أجلي.. ونصرة لأنني كتشت كل نقط ضعف الشيطان.. قاله ياللا بقي مع السلامة.. ويقول معلمنا لوقا وتركه إلی حين.. الشيطان ما يتعبش ورجعله مرة تانية عن طريق بطرس وقاله ما أعرفش إيه وقاله المسيح إذهب يا شيطان.. هو جه إستخبي فيه.. ورجعله عند الصليب وقاله إن كنت إنت الله خلصنا وخلص الآخرين دول معاك لكن ليس له فيّ شيء.. **"رئيس هذا العالم آتٍ لكن ليس له فيّ شيء"**.. وجاءت الملائكة تخدمه كإعلان إلهي للكنيسة؛ إن الملائكة

عمالة تخدم فيها.. خدامينها يسعوا فيها ويتوبوا الناس
عشان يقربوا لربنا، ويرفعوا صلواتنا للسماء.. الملائكة عمالة
تشتغل شغل في الكنيسة.. الملائكة بتخدم في الكنيسة
بإستمرار بإستمرار بإستمرار.. جاءت ملايكة لتخدمه.

لإلهنا المجد دائماً أبدياً.. آمين.